

## KATA ALUAN OLEH DATUK MARIMUTHU NADASON



Saudara/i Rakan Bukit Larut,

Saya ingin mengalu-alukan anda ke laman web ini. Adalah satu nikmat bagi saya untuk meneruskan perjuangan ini yang bermula pada 1990an. Pada 1997, satu projek bernilai RM 200 juta dicadangkan di mana kereta kabel adalah salah satu projek. Kemudiannya pada 2007, satu projek kereta kabel bernilai RM 60 juta dicadangkan. Kini, pada 2009, satu projek yang sama (RM 60 juta) termasuk lain-lain di cadangkan. Tiada penghujung.....

Kami menyambung usaha yang dimulakan oleh Persatuan Pengguna Taiping dan ERA Consumer yang kemudiannya menjemput FOMCA bersama untuk melindungi ekosistem ini dan lebih penting lagi kawasan tadahan air di situ. Satu kajian biologi juga telah dijalankan dan boleh dibaca dalam laman web ini (versi Bahasa Inggeris).

Sebagai seorang aktivis NGO dan penyokong kuat Pembangunan Lestari (Sustainable Development), saya berasa projek ini tidak akan memanfaatkan mana-mana pihak di Taiping kecuali penjaja dan pengutip yuran kereta kabel. Projek yang akan menjadi 'Gajah Putih Taiping' tidak patut disokong.

Kawan baik saya, DM Ponnusamy telah menulis buku **31 Perkara Pertama di Taiping (31 Firsts in Taiping)**. Ini merupakan keagungan warisan yang tidak dijaga. Apa yang kita dapat lihat adalah bangunan bersejarah menjadi mangsa pembangunan.

Dalam lawatan baru-baru ini saya dapat berjalan naik ke Bukit Larut. Saya dapat perhatikan hakisan, tanah runtuh yang 'senang diperhatikan' sepanjang jalan ke atas Bukit Larut. Pengurusan sisa pepejal (sampah) juga dalam keadaan yang membimbangkan kepada kawasan yang sensitif ini. Jika dengan kadar pelancong yang rendah ia masih terabai, bayangkan kita menghantar 1000 pelancong ke atas Bukit Larut?

Kami membantah projek yang dicadangkan ini bukan kerana tiada kerja lain yang hendak di buat; ia adalah untuk memastikan kehendak rakyat terjaga. Usaha untuk memelihara Bukit Larut akan menjadi usaha kita bersama. I menyeru agar anda bersama-sama menyertai usaha ini di Bukit larut dan juga bukit-bukit yang lain daripada dijadikan mangsa pembangunan. Penghapusan kawasan tanah tinggi adalah penghapusan masa depan kita sendiri.

Lebih banyak program akan dijalankan di Larut, Matang dan Selama untuk meningkatkan pemahaman tentang isu-isu berkaitan dengan Bukit Larut. Daerah ini bergantung kepada Bukit Larut. Selamatkan Bukit Larut, katakana tidak kepada pembangunan kawasan tanah tinggi. Tinggalkan warisan untuk anak-

anak dan cucu-cicit kita. Sokong laman web ini, sertai Facebook kami dan emel sokongan anda kepada **info@bukitlarut.com.my**.

Yang benar,

**Datuk Marimuthu Nadason**

*Aktivis NGO sejak 1981*

14 Februari 2009